

梅亭先生四六標準

二

四
六
標
準



梅亭先生四六標準卷之一

言時政

上史丞相

嘉定丙子

索長安之米擬就辟書伏光範之門尚干賓謁特
有倦倦之意未敢察察而言輒以萬分寫之四六
儀圖愛助此周人待山甫之情翁受敷施亦虞舜
舉臯陶之意他無求者公幸聽之竊惟國家間暇
之時當思文武長久之術况外夷之雲擾貴內治
之日嚴詎云行李之通可緩包桑之慮國虛難動
民困易搖豈待謀國之數八公知諱用兵之兩字然
能應則乃可謂定故欲翕者未始不張今徒千里
而畏人未思四境之不治一氣先竭百爲弗開羣
材付之乍佞以乍賢正論聽其自鳴而自息耳目
之受旣狹心腹之委亦偏爲赤子爲龍蛇未始得
敵情之實以皮幣以犬馬但云量事力之宜軍籍
旣隱於蔽蒙將材又阨於媚嫉舟師未練馬政不
脩鑿斯池築斯城豈可無九攻之具鍛乃戈厲乃
刃孰能遏再鼓之衰仰而思之無非事者上作而
下不應朝廷每有是言外呼而內不聞郡國亦爲
此論惟事事備乃可無患言人人殊何以成功周



得上漢得中策將安決蠡治內種治外責恐宜分
試考先朝立四總管之謀及觀諸儒分三大鎮之
說皆欲取之人望從而假以事權一用孔明陸遜
之規模力行晁錯充國之論議移江上之屯於淮
上實關表之粟如關中使權守禦之方漸講招懷
之略衆犬方信則養威持重兩虎旣傷則取亂侮
亡是爲屈羣策以共圖奚至無寸功之可論與其
待一朝之患始出於茲孰若折千里之衝早爲之
所若任人而疑疑人而任則聞事不實實事不聞
何怪草野之私言動違槐棘之成筭日月逝矣風

卷一

雨萃之無謂天變不足慮人言不足從庶幾君子
有所恃小人有所畏恭惟某官堪輿間氣社稷世
臣砥柱不移回平原黃河之決終風且曠洗咸池
白日之光力調更化琴瑟之弦復享和戎金石之
樂如將道古今而譽德亦可紀簡策以垂功然太
師維垣輔隆興不滿一歲今西平有子相嘉定行
且十年此非門戶之私榮實負乾坤之重寄用藥
莫先於無病止車當在於未奔相亦惟終邦其無
數如某者拙由地稟狷不時宜獨竊考治亂之原
知當謹幾微之會貧賤不能以達志憂患又從而

熏心昔在服中欲上范文正之書而無路今來闕
下願作石徂徠之頌而難言薦之吾相者欲令主
金耀之書謀及乃心則姑願應銅梁之辟等勤大
播盍進小忠敢輸肺腑之微誠盡告腹心之元老
一毫有補萬坐亦甘平津之招賢有三惜難受汲
生之贛洛陽之太息者六實欲全周勃之功

上鄭參政

昭先

干祿選曹未遂斗升之食修容政府率須四六之
文循例之常非頌則禱然古者執可殺之贄而今
則獻無用之言反欺闇人謂有已見輒輟贄山譽

卷一

斗之佞移爲滴露增海之忠其聞夷夏貴賤名位
不同南北動息機緘相繫兩庭分而漢室弱五胡
擾而晉事多嘗試攷古以驗今恐當制治于未亂
然而內備外禦之計墮在文恬武嬉之中民力中
乾邦儲內滲以人材則非競以士氣則不揚將多
庸人軍半虛籍縱無敵國之外患已非盛世之遠
圖設有赤白囊之馳必貽赭黃繖之慮天大地大
託之真無敵之儒人謀鬼謀當爲不可勝之備無
非事者必有先焉折衝樽俎之間固貴矯情而鎮
物銷患廟堂之上要須從衆而廣謀徹去私情力

行實政培植根本振刷精神大勢既張何事弗立
當機不發雖悔莫追執政之猶股肱相尊等耳憂
國之如飢渴公早圖之恭惟某官學本六經氣鍾
五緯涵今茹古曾藏有本之源泉揭德振華身作
不清之玉雪自其不辭小官於州縣之日已知可
以大受爲社稷之臣人交惜其用遲帝已嗟於見
晚致身兩社倒指六年自生民以來未有盛於夫
子任天下之重時則有若阿衡三台色齊萬物氣
吐惟保我子孫黎民之衆則格于皇天上帝之心
如某者鹿鹿無竒魚魚何筭謬塵一第濫厝百僚
惟悴之吟湘濱孰爲之地嗟吁而攀蜀道竟失所
天旣銜弗洎之悲漫作爲貧之仕適之謂材堪之
謂力不足乎揚薦之吾相致之吾君皆非所冀但
願王者之佐每先天下而憂儀圖之莫助之斐然
僭躡其進也與退也惟所指搗

上曾樞密 從龍

讀阿房之賦早累殊知投光範之書今無他覲特
以門墻之舊得觀鼎鼐之新欲輸愚慮之千往抵
賀錢之萬譬諸大海豈有待而增加然在細流固
不嫌於傾寫某聞交鄰有道寢兵固帝王之功制

勝無形銷患在廟堂之上今犬羊之交噬以蚌鷸以相持殘虜僮甦怒將移於水蟹新酋稍偏殃易及於池魚至如歸附之民亦是紛爭之釁戰守和之未決難察察言兵食信之何先宜事事備今徒懲創已往之失遂致闊略方來之憂本惡張皇事反流於怠弛初求鎮靜弊乃至於蔽蒙最是民困易搖仍覺兵虛必潰言之唇腐識者心寒城非不高池非不深險誰與守飢者欲食勞者欲息怨豈在明藉今有效死之民亦未見決勝之將外憂縱緩內蠹已多願察積薪厝火之形亟爲徹桑未雨之計通民氣於士氣參天心於人心收拾羣材恢張衆志戒牧守之忒刻斥將帥之驕殘亟厚邦儲速蒐軍實無非事者綱旣舉則目張不早圖之枝未害而本撥和羹固異於濟水同舟况迫於遇風公輔居兩社之間相尊等耳大臣不四方之慮人望謂何恭惟某官恭懿而惠和弘深而肅括榮進素定夙瞻魁下之曰台昭晰無疑豈待日中之見斗信儒者有益於國見天之將任是人未嘗揚己以取名殆欲格王而正事自參宥密益懋弼諧古所謂鄰哉之臣人將責賢者之備誠能歸草茅之

公議置在本朝從而散廊廟之泰和達之薄海此
真漢相矣豈憂匈奴哉上將恨無官以酬公公亦
可有辭于求世如某者竊由氣稟拙不時宜頃因
場屋之文特蒙偉視繼修竿牘之敬又沐賞音回
回州縣之塵落落功名之夢本謂伯樂之旣顧羣
馬可空寧知烏獲之難逢匹雛莫舉竊料黑頭之
宰相亦憐白脚之門生然願廣萬間以庇寒詎敢
私斗升之活涸捲珠簾於未老勿疑驚燕之呢喃
令江水兮安流庶遂閑鷗之浩蕩

贄見

見趙茶馬

彥紹 全篇用茶馬事

訪火井於臨邛偶逃水厄望星槎於仙漢行拜月
題尉江湖渴夢之深瞻原隰華鑣之沃伏念某地
寒而根淺年運而骨高斟酌曾中固欠可人之風
味局促轅下粗知範我之馳驅與其包裹供權倖
之鑽不若蹭蹬任風塵之老况乏揮毫之百斛固
應病額之十年懶問蓬萊羣仙之司遂叱邛徠九
折之馭其甘如薺豈必衆嘗言刈其萋願爲君御
恭惟某官雲龍氣局天驥風標架屋挑源三椀澆
五千之卷乘輶棘道一雄將十萬之雌却笑前丁
後蔡之籠加安得超范軒轅之繳繞加臭味而厚
賓客漫令策兔褐之功盡骨相而遺毛皮諒必察
驪黃之外如某者不持圭璧未洗袴袍特窘城南
晏食之謀遂入冀北暮取之數味已輸於第一價
敢望於倍三草茶無賴空有名敢妄希於湔袞塞
馬未必不爲福或可備於走趨

上魏運使

了翁

聞宇宙之大名如瞻喬嶽抱江湖之渴夢今在下
風乏紹介以爲容修辭誠而求見某聞士之任重

固不止獨善其身儒者道高先當知有貴於己若
靡然斷趾以適履必至於舐痔以求車操行既卑
國家何賴有能卷舒之際不爲燥濕所移如蘇文
忠之違熙豐亦不苟同於元祐若劉忠肅之惡章
蔡然非強附於伊川是名蜀珍可重趙鼎觀公氣
象視古等倫茲故賦明月烏鵲之詩亟欲快景星
鳳凰之覩恭惟某官眼高四海曾著千年漢相有
真宜居蕭曹丙吉之冠鄭公所願蓋在稷契臯陶
之良當炙手可熱之時凜掉頭不住之節長卿甫
還於巴路元濟已叛於蔡城神山可巢固自薄蓬

標一

萊而不即攬搶未落必欲借荆楚以同功雖卒成
孺子之名然已立懦夫之志一麾而出十暑于茲
回視獨對三千字之人誰肯甘頓十九年之刃萬
牛不能回丘山之重四牡又復勤原隰之馳要路
在前聊養韓忠獻之器榮進素定何必王文正之
門然海內所以屬望於公蓋天下尚有可爲之事
幸昌其志以濟斯民惟功名當久遠之看則富貴
乃緒餘之事如某者居貧甚肆從仕難任矢汗漫
九垓之期分甘控地逐侏儒一囊之俸豈必鑽天
乃速隨黃鵠之梯蓋願事碧雞之使雖神索於大

巫之側當氣蘇於君子之前嗟遠道胡爲來哉幸
將在此居是邦事其賢者儻或許之

上任中書

希夷

披雲漢之天章夙見舍人之樣勒山林之俗駕來
瞻學士之真極知大匠之門難飭小夫之牘顧無
藉手輒用引吭竊開師儒並世之難類有今古殊
時之歎韓昌黎之於太白漫夜夢以晝思陳後山
之於大蘇恨江空而歲晚今有文章之伯實在邦
域之中公求士甚士之求公旣聞命矣後視今猶
今之視昔盍往拜之伏念某氣懦弗張骨凡難換

標一

九

一科十年之不補愧在無聞半通五兩之甚甘止
於爲養曾幾何日竟失所天陷皆腐膺僅能逃死
磨肌瘦骨奚暇送窮琴翁忽以成聲塵甑睚眦
而望賜心口相語但欲從小宰之銓面目可憎未
敢作大鈞之問惟是忍見賢之渴所當修覲德之
恭或聞庸下之姓名已辱暗中之摸索逢人必項
斯之說幾於神比而天同伴直難浩然之呼特以
職親而地禁仰高山之景行感流水之賞音樂莫
樂兮相知安有又傲翰林之理見所見而後去姑
慰不願封侯之心恭惟某官學冠儒纓道航聖瀆

家故雄於四蜀誰敢齒於諸任騎鯨暫駐於九龍
振鬣遂喑於萬馬周情孔思心傳先聖之不傳宋
艷斑香文到古人之未到久於詳試昨乃遄歸士
則快於覩先帝已嗟於見晚能典朕禮咨伯直清
肯從吾兒煩君調護玉堂草罷又吟紅藥之翻金
匱紬餘還對紫薇之伴彼智效一官而不足此身
兼數器而有餘人望一條之冰其容已肅公傍九
霄之月所樂不存豈非爲天子之私人實持公議
行且作清朝之近弼尤佩遠憂今外夷訖阻之時
正中國圖回之日天地亦大矣保邦當在於未危

標一

人物方眇然求才不嫌於太廣與其待倉猝而市
三年之艾不若及閒暇而滋九畹之蘭時來爲之
天下幸甚其貌無可贅輒誦所聞幽桂遺榛管底
敢累犯嚴之口江梅託桃李但欲薰自潔之香

上吳宣撫獵

祭主簿之竈揆分已庠升侍郎之階見賢有耀末
之藉手率爾修辭竊以平生識元魯山便無他憾
於人見歐陽子乃謂竒逢三復師儒並世難之詩
再歌生世何用早之句江濤如此孰能百斛而獨
扛人物眇然誰可一洗乎萬古疑山川之沉寂恐

宇宙之沈寥適我願兮在此行矣恭惟某官肝膽
一劍精神五兵言行擇君子之中庸德業得賢人
之久大涕唾富貴談笑功名蜀道天高久已放龜
而縱鶴長沙地褊不妨狎鷺而馴鷗新詔祿於壽
宮表眷懷於宣室今天下尚有可爲之事無競維
人凡海內所謂不獲之夫豈勝其衆能風霆於庶
物必霖雨於四方天將大任是人恐不免耳道之
將行也命孰能止之某鹿鹿無庸徂徂有志半生
拙學已不計班貨之崇庠一世偉人所願觀道德
於前後騷騷忍渴貿貿望塵然李生之從事湖南
知會計當而已矣果吳公之召置門下豈遙增擊
而去之

上曾運使槃

一行作吏俗莫俗於簿書六轡觀風華孰華於禮
樂恃在鎔之所鑄忘躍冶之不祥斐然修辭持此
徵福伏念某材庠莫亢質竊無竒長鏡掘黃獨之
苗只傷地脉短檠喧綠幕之讀徒損天和苦無計
以養親遂強顏而干祿一科不補漫得雉於喝盧
五技已窮欲屠龍而單產騷屑倚門之望卑陬祭
竈之謀趨鎗閣前之鈴僅逃筆楚倚賴天涯之釣

大隔波濤我有二天今既數月幸樓臺之近水盡
桃李之託根薰南豐之香人爭出其門下認西江
之派我未免於鄉人試伸仰首之鳴庸卜終身之
遇恭惟某官眼高四海筆落九天惟其有之種種
文清之似由來遠矣源源忠恕之傳宜供奉於軒
墀顧驅馳於原隰無波古井浸秀水之美容有脚
陽春轉光風於蘭蕙雲開衡嶽星聚壽沙治不收
聲各使安其田里民無遺便皆自得於湖山六條
遠憺於風稜百吏莫逃於水鏡尚念某頃嘗執贄
頗辱賞音無地置錐慙處囊之非穎留渴待井愧
汲綆之不脩與其索大寒之裘不若乞來年之麩
消人買死馬首亦繫招徠上天不生鶴翎盡歸啄
抱歸投之切敷叙奚殫

上董制置

居誼

四年再累於大鈞非言可謝萬里重瞻於小隊有
喜難名竊聞沒階之趨又須銜袖之贄獵較固難
於違俗效顰安得而成妍伏念某意廣才踈名浮
實淺諸公過聽雖欲挽之振鷺之羣一飽難諧敢
望富於屠羊之肆徒感招徠之厚遂忘跋履之勞
經瞿塘灩澦之危寸心欲折上梁山桂林之峻雙

脚已低不自意全得至公側就新濡而悼前猛詎
應寄歛退於趨營酬知己而效小忠或可因蹉跎
而束縛茲蓋伏遇某官求士爲國與物爲春網羅
蜀珍旣厚楓柝柵檻之蓄收拾鄭璞欲置璆鐵銀
鑊間况如鄉里之小兒乃是門墻之舊物撰書詞
具馬幣旣加繾綣之誠防瘴癘養形神仍委駢蕃
之况肺腑固知於銘德頂踵何足以酬知某敢不
思稱使令圖惟忠益在元戎所自辟於天子豈欲
收蛇雀之恩惟先生無圖利於大夫庶或盡犬雞
之報

上李侍郎

臺

捧從事之檄假道不專升侍郎之階見賢有便闕
然藉手率爾修辭恭惟某官心契九秋文燄萬丈
二螭坳處非仁義不陳於王前五鳳樓中有言語
必妙於天下方餘色石忽觸佞山遂橫野水之舟
歸屹中流之柱道之將行也命孰能止之天將大
任是人恐不免耳暫輟北門之鑰來分東梓之符
棠棣之華固已生光於五馬棟梁之器詎應回首
於萬牛會東閭闔之風亟對呆魚之月某久於竊
蔭甫此望塵異人異書不但慰望梅之渴同姓同

業尚或希拔茹之征

見李提刑死

系成紀之望敢論繼別之宗受月湖之知抑有同
門之契假道得見賢之便修辭爲執贄之先恭惟
某官一卅儒宗三朝壽俊田里之無愁嘆幾森畫
戟之香原際之有光華仍揭繡衣之節使登表著
丕究猷爲豈惟朝廷賴有德之尊抑使海宇蒙不
知之潤不謂解彭門之組便欲挂神武之冠正恐
蒲輪之迎難遂摘穎之隱即觀詔下入對席前某
久於傾心方此望履雖吾宗之老孫子未知所裁
然

然是邦之賢大夫或與之進

上梁運使綸

手捫參井冒希入幙之賓身近斗牛喜見乘槎之
使竊循禮例再具贄緘伏念某不自力田乃謀耕
祿長風引去固應違汗漫之期平地尚多亦可逐
株儒之俸必欲勇乘灑瀕之象幾何不餒巫峽之
魚百丈牽江失勢頓成於千丈萬夫拱手納溝知
耻於匹夫不自意全僅以身免汨俱其出粗見平
生忠信之功痛定而思可爲行險僥倖之戒召驚
魂而復幹企英節以修容營吻無竒汗顏有醜恭

惟某官盛名如晝和氣猶春四牡勤原隰之咨三
鑽巴火萬牛回丘山之重共託蘇天人但知河內
借之情誰能識關中留蕭之意邊陲既靜足稱慎
寇下之冰壺吏道當澄尚託胸中之水鏡特恐魚鳧
之國難稽龍馬之圖會當紀日月之常亟入聽星
辰之履尚念某不辭險遠求備走趨使臣之載馳
載驅或小留於斧繡辟客之且喜且懼尚迄託於
旻

代上安撫

去民畝而就吏夙歸坏冶之中聞仁政而受屢今
在旻之下久熒熒而在疲難僕僕而望塵逮茲
祥除敢以贅謁恭惟某官直方而大智勇且仁應
西山之石移果崑崗之玉出識其小者數虎榜之
十年誰其似之扛龍文之百斛付榮進於素定屢
勇退於急流怡然野水之孤舟屹若頽波之砥柱
於皇更化副帝登庸彌綸兩社之間弼亮萬機之
務騰身跨汗漫豈料羣兒之愚濯足歌滄浪少警
衆人之醉假泰階六符之照措長沙千里之平少
留蔽芾之甘棠庸展切磋之淇奧公歸無所即有
袞衣繡裳之詩我儀圖之請繼濃墨大字之頌伏

念其名在屬籍實則寒儒朝齏暮鹽長兀窮年之
燈火夏絃春誦恐孤傳世之詩書方小丈夫偕計
之時適大參政登朝之日對硯中龍蛇之影遙識
璇魁接天邊鴻鴈之行偶聯金榜所恨拘貴賤之
分未由觀道德於前天惠仁侯曉行湘水赤舄几
几雖嘗再拜於車塵素冠纓纓何敢數干於閭吏
賴廩人之繼粟活孝子於寢苫幸周踰月之期敢
廢披雲之敬十年不調或欲爲再命之圖一氣轉
鈞願更使匹夫之被

代見丞相

代朱提幹

齒塵埃之下吏夙感大恩拜雲漢之上台輒裁小
櫝戴德有丘山之重修辭無月露之工斐然搖毫
滂若流汗伏念某妄庸晚進艱苦早孤念昔先人
固嘗拜龍虎之榜不腆後嗣何敢吐蝸蚓之科然
徒用外家之恩始得塵下士之列頂踵實歸於陶
鑄肺肝嘗切於鏤銘甘辭曹掾之優聊適步兵之
隱經禮三百亦嘗偕計吏之行進士五千獨未中
太常之第猶蒙藏疾獲遂養痾侵尋二考之書獲
落再命之計然念長伯樂之廐苟不自鳴縱或抱
和氏之珍誰其見賞敢伸九頓首之請併祈一轉

手之仁恭惟其官直大以方清和而任時則有若
伊陟實繼阿衡之覺先公其惟時成周足邁伯禽
之拜後積卜六載更弦之化收七十城憑軾之功
營東函西煩整頓乾坤之手燕南越北知扶持宗
社之心方將恢萬世之基益廣開衆正之路有如
門下桃李之數或堪籠中參朮之儲是能容之非
敢望也尚念某難留冰幕盍返糟丘一氣之轉洪
鈞儻拜成終之賜萬間之庇寒士敢忘報國之心

代上丞相

代趙惟綱謝夫

綴京幕之下僚茫無操挾瞻宰衡之上相敬布依

卷一

歸惟其恃我公之如昔賢故敢提孤生而進門下
蓋臯陶之弼舜以翕受爲規模至伊尹之佐湯以
旁招爲事業下至蕭曹丙魏之於漢以及房杜姚
宋之在唐皆因收拾四海之材用能輔成一代之
治載在信史是爲元勳至如先正越王之忠實開
孝宗隆興之業張子公服其汲引之量沈德和愧
其用之言不惟國以得士而昌亦是家有達賢
之後故國非謂喬木實倚世臣成績紀于太常益
光先烈恭惟某官忠貫日月誠塞天淵溫乎得聖
人之和毅若任天下之重人見伯禽之拜後依然

無驕士之風誰知孔鯉之異聞得之自趨庭之日
垂紳正笏不動聲色強本折衝自得精神齊城既
入於地官周寶乃歸於天府然且厚棖闌店楔之
蓄幾於無毫髮絲粟之遺是乃傳禹稷之心豈但
接韋平之武伏念某強名屬籍本實寒儒既無長
吉之文章又乏更生之學問幼年筆硯燈無太喜
之花繼世簪裳袍已半枯之葉一尉南昌而奚補
再丞廣信以徒勞雖亦蒙臺府之吹噓然終厄銓
曹之選調茲贅負於冰漕實隸役於日畿幸逢大
匠之鈞陶誰非躍冶正恐無言之桃李下自成蹊

卷一

敢因三吐哺之餘輒伸九頓首之懇譬諸草木安
能醕雨露之恩刈爲薪芻亦是報乾坤之造

代上丞相 代鄭司理

觸五嶺之熱叨李椽以終更企六符之光趨槐庭
而執贄既快鳳凰景星之觀輒謀烏鵲明月之依
修辭斐然犯分愧甚伏念某簪裳墜緒場屋老生
再鼓而衰已蹉跎於壯志三獻不刖乃塵綴於末
科初無進取之狂粗識簡書之畏味我自愛桐鄉
之句謾試弓刀誦人誰送臨賀之詩往司狴犴粗
知勿誤于庶獄初無可折之片言歲厄閏年良動

故人之念天憐孤迹偶逃新鬼之羣竊聞大鈞之
無垠雖占小善而必錄譬猶草木雨露無甘苦之
分雖在江湖潢潦願消塵之助恭惟某官道先民
覺忠結主知聖朝之相頻頻已過中書十四秋之
數閱官之詩奕奕方開異姓五百年之封無敵知
真儒之功可久見賢人之德問鄧禹而披輿地蓋
將膺萬國之貢珍得伊尹以格皇天詎止俘三
之寶玉惟有邦有家九德咸事則無怠無荒四夷
來王豈以洵故官冗耶願善鄭以勸來者尚念其
固望斗升之活亦希尺寸之垂猶泥在釣猶金在

鎔是全託一陶之造若川作舟若旱作雨諒欲遂
萬物之宜

梅亭先生四六標準卷之二

論事

代王縣丞上薛檢正

極

捕盜求改官

效微勞於采棒曾發宿奸開公道於青雲與叨信
賞料虎頭而苟免奔雞肋而未能幸而得之知所
自矣切以鬻牒度民者非國計之得已亂名改作
者乃王制之必誅今有偽爲二三尺之綾遂可坐
罔八百緡之錢是姦夫與人主同利故平世而天
下乏財我能往彼亦能往歟是可忍孰不可忍也
稽諸令甲載在先庚苟能掩羣而得其 則有

功而改其秩輿論猶疑其未厚臺端至不於中明
詎知應格之官終困舞文之吏功疑從重顧以無
可疑而從輕令出惟行必欲扼其出而惟反自非
國論恪守邦條孰云牛馬走之功便有雞犬飛之
便伏念某粗識丁字濫塵乙科以十年而到鳳池
可羞儕輩呼五百而取鼠穴何等勲庸然用一尉
之酸寒盡得羣兇之狼藉不言祿而祿亦弗及轉
爲丞而丞亦負余既有功而不見知則爲善者亦
何利會逢上哲出正舊條事若出於天然恩有爲
之地者伏遇某官靖共正直明允篤誠數典延平

識胥皂百端之情僞屢將使拍知寒素五剡之艱
難察其捕蒲澤之姦可僥寸賞憐其索長安之米
將及三年故因屯膏復申巽命惟是望賜更欲乞
靈使早遂通籍之圖無以受逆旅之困是爲終始
盡出生成其敢不俯策驚庸仰酬駿惠日之夕矣
踏可免於選人天實臨之報敢忘於國士

上樞密鄭知院

昭先

出幕罔功妄作大鈞之問掃門得請敬投光範之
書引吭何有於鏗錡出吻謾勞於營度姑裁狂簡
仰黷高明伏念其質竊而材凡氣凋而 腐少也

標二

師爲己之學未深志於四方壯而耻有 乏之念如
強顏於一第每懷竹帛之尺寸詎甘溝瀆之尋常
俛焉孳孳爲爾寂寂猶有布韋之氣習未忘子墨
之生涯灰撥陰何不過人間煙火之語氣摩屈賈
亦非天上雲漢之章然小人僅可以小知故大慙
或謂之大好摹訓誥之軌範稍續茶經準筆削之
權衡頗修僧史雖諸公貴人欲出其門下然古來
此物當弃之道傍迂回蓬島之舡去泛瞿塘之棹
崔郾之陪宗閔本圖向闕以聯鑣少陵之客嚴公
幾入磨牙之吮血二年劔外寸步矛頭動與仇謀

詎敢愛鴻毛之命嘗有天幸乃偶全馬革之屍難
擊柱以爭功姑闔門而俟罪西曹地忍幸不汝疵
東閣天寬理難自絕實爲時輩所見推許夸哉韓
子之詞圖報國恩獨惟文章悲矣抑侯之志然果
耻匹夫之弗獲詎容名一藝而不庸冒焉以前恃
此無恐恭惟某官冠冕四輔柱石九筵自其不卑
小官之時已見將降大任之器獨司兵本全樞機
品式之功參秉國均總甲冑衣裳之柄有常立武
無競惟人齊人歸鄆謹之田已見仲尼之已試宣
王復文武之境亦惟方叔之壯猶諒欲四夷之來

標二

王益思九德之咸事爾惟麴孽固將齊酒醴之和
雖有絲麻定不弃蒞官之賤尚念某百無操挾再
有干摩天下官豈以洵故冗耶或容寸進海內士
賢於隗者至矣是在一陶

上衛參帥

涇

辭權司戶

請鄰祭竈正虞誦道之非越俎代庖茲負畔官之
耻處賤良難於拒貴靡初猶願於圖終退未遂於
一辭告敢忘於三瀆切以士伸於知己固若錐之
處囊上急於貧賢則有羅而致幕至如常鱗凡介
之儔匹何計雙鳧乘鴈之去來彼方惡蠚於水中

此敢探龍於領下伏念其自紆士服粗識廉隅萬物皆塵妄意古人之學業一科不補隨身俗吏之簿書今趨踰閣前之鈴雖倚賴天涯之釣然於苟賤終不忍爲誰誤兩連帥之知俾承三語掾之乏比權量力等齊汨之與俱商財計實真唯阿之相去今朝有逐客之令使士無出位之思難耻過以作非盍爲法而受惡彼有取爾藉不爲鼯鼠而發機仰而思之亦何苦與雞鶩而爭食當望塵而雅拜嘗敷衽以陳詞言語精神不能自明頃頓夷諾殆於無耻杜陵旣蹭蹬於垂翅忍辭大臣韓子非

懷二

四

狂惑而喪心豈傲相國今日之受非前日之受是吉人之辭寡躁人之辭多萬一矜從俾自得湖山之外尺寸勉竭固猶在邦域之中恭惟某官勳塞兩儀惠歛一道翕受敷施而下士之風厚旁招謹簡而蓄德之地寬陝而東陝而西方弘周召之化洛之南洛之北自多溫石之材願從祝雞之翁徑返屠羊之肆庶不重勞於造化抑令少遠於嫌疑某敢不洗濯其心靖共爾位大鈞播物切勿爲小智而私直道事人持此作曲成之報

代趙縣丞上衛參帥

師長

進光範之三書昔徼一顧試藍田之貳令今隸四
封事非出於天然誰肯爲之地者切恃處囊之舊
遂忘躍冶之嫌歲在丁卯之間日有戊申之奏行
人爭御下暴骨於三軍權首逋誅上寒心者累月
維時新豐之旅忍愧宗周之嫠虎守九關難叩闈
而告天子鵲遶三匝遂升階而揖侍郎冒投銜袖
之書極論寢薪之勢恐坐西曹之謫反蒙東閣之
延引之後堂使竭陳其議論待以前席多優假之
過辭不踰時間所陳略施行矣爲知己死此意何
敢忘耶伏念某強名皇宗其實素士寡文生之經

標二

術蹉跎太乙之期之太白之詞章牢落長庚之夢
然猶可自別於流俗未嘗肯受知於衆人逢麴未
免於流涎見彈何嫌於求炙三吐哺而下白屋昔
者見之一舉手而轉清波今其時矣欲卜終身之
計試裁小子之章恭惟某官學覺天民忠結人主
禮樂三千字早獨幹於倫魁才名四十年晚始參
於政路惟其已大而物小是以退易而進難夷狄
聞潞公之年幸其未老兒童誦君實之字持此安
歸入亞秩於紫宸出分符於赤社展洞庭九州之
大聊卧孤舟措長沙千里之平如安九鼎帖楚之

衣裳一正歸周之衮繡何疑馬渤牛溲儻廣儲藏
之用鼠肝出臂敢干亭毒之中官豈以洵故冗耶
士賢於隗者至矣其敢不服龔廉勤刮摩躁妄小
草有遠志敢自詭於參苓大匠無弃材或兼收於
店楔

上安撫衛大參

涇

備老聃之役不贏數米之糧倚孔子之墻輒起鑄
金之問見彈固嫌於太早索裘尤戒於大寒敢因
麴車之逢預祝甌窶之滿伏念其門庠無挾質弱
不張迫於三金之謀妄斗升之嚙嚼墮仕一科之

標二

底空分寸以躋攀尋飲露之湘纍難乞於曹指
元戎十乘忽來霄漢之邊泰階六符首照盆盎之
下受約束於大府付竿牘於小夫苦乏君房之語
言輒冒晉公之書記代匱丞壁承乏椽曹初無左
右之容曷爲特達之遇今旣數月矣幸免適於西
曹勤至他人乎盍輸誠於東閣欲借一陶之力將
爲再命之階近水樓臺諒不難於得月連雲門戶
幸無憚於捲簾恭惟某官柱石朝家權衡士類衡
山千里暫勤申伯之于蕃淇奧三章即詠武公之
入相廣馬渤牛溲之蓄厚豕苓雞壘之儲豈無他

人皆借吹噓而送上頗有此客必蒙摸索於暗中
忍飢既及於明年卜稼請從於嗣歲某縱無以報
敢負此心身雖未可以許人士固必伸於知己黑
頭宰相必賸滋九畹之蘭白脚門生或請備一株
之李

代上安撫

乞寬假

采棒禽姦罪已幾於失入洪鈞貸下情卒附於從
輕愧在其肝感深至骨永言百吏之底無如一尉
之卑日噉二升便謂養鷹鷂以逐烏雀夜半片紙
常使搏虎豹而捕龍蛇稍遺亡命之徒禡身

標二

而去至有毫釐之謬又難三尺之逃要一為捕
之猫尉真無狀至於鞠受辨之鼠職在有司某之
迂愚人所鄙笑無子真之骨浪求吏隱於吳門非
隨會之材安得盜奔於秦國既青氈之物略在而
絳裾之迹粗明悉上送官乞從辨究惟良折獄反
責過差罪無在多已聽惟行之令人有不及誰原
可恕之情伏遇某官日月容光山藪藏疾俯念鼠
肝之細難安雞肋之權罪疑惟輕但令勿誤于庶
獄人誰無過寧忍求備於匹夫致此孤危迄從寬
假某敢不謹衡諸慮深佩此恩王者之法如江河

不再犯矣君子之過如日月願一洗之

代上楊提刑

求此

主會計之文書恐無多日瞻光華之禮樂將近二
天亟亟疵賤之名謹候消疇之聽伏念其一寒無
似百拙有餘十年身事於考亭未聞大道千載曾
傳於渭水安識壯圖妄緣一日之長躡受乙科之
寵中更家棘遂爽成瓜甘蹠蹠者九年始睚眦於
寸祿王珣能令公喜恐未必然孫寶安得自高聊
復爾耳惟是塵埃而箠楚孰爲風雨之幘幘敢持
矮屋之官聊累崇臺之芘恭惟某官果一而藝青

標二

任以和自其不辭於小官可卜晚成之器

器也之

詩書而無愧肯詭十禽送以禮樂而有光遄驅四
牡肅受周祥刑之寄實專唐採訪之權展衡山千
里而遙民無遺便滋沅湘九畹之種士有特招有
如至賤以至愚自此受容而受察主簿自有分職
雖無可備於使令使臣周爰咨諏更乞曲加於全度

代許提幹上丞相

贊冶鑄之司滿秩濡頰之塢恃鑪錘之舊歸身光
範之門持幕府十年之蹤干秦堦六符之照切惟
修政攘夷之日此正任賢使能之時天既全付予

有家昆夷喙矣我惟無戮其康事丞徒揖之與其
拮据捋荼之獨勞不若䟽附奔走之分任孔明之
布公道先廣腹心元齡之訪賢材在恢耳目使嘉
魚不入於鈎罩則凡馬徒費於豆芻誠能開衆正
之路杜羣枉之門何難建久安之勢成長治之業
恭惟某官清和而任直大以方續師保萬民之功
人羨魯公之拜後開父子三公之美天亮史冊之
推誠不惟歸齊疆之侵又將取燕人之悅寧王遺
寶果全璧以來歸下國綴旒爭奉珍而入賀諒思
翁受於九德益用勤施于四方庶幾折一里之衝

集二

二

無使有一朝之患如某者揆材無似知命不猶向
者偶然一第之登固在作者七人之後再命既升
於畿幕三熏幾沐於甄陶不虞局促之駒竟作差
池之燕一星終矣十日寒之茲偶幸於章交復得
瞻於禮樂草茅言天下聊復陳千一之愚桃李在
公門或不罪再三之獻

代王丞上丞相

躡南墻之故迹有幸終更企東閣之翹材無能爲
役徒以生三台之下久於望六符之光旣乏根柢
之先容恐成草木之徒腐敢修駢斐敬布依歸伏

念某赤城迂儒白屋賤士壯歲從燭湖之學敢論
同門之朋中年題慈恩之名偶值更弦之化雖已
長伯樂之廐未及掃曹相之門供簿四方空釣鰲
於海上貳令一邑聊聽鶴於雲門適逢操刀製錦
之傷連爲越俎代庖之役士民相安其勞拙臺府
過謂之廉勤然所謂推轂之章竟奪於負舟之力
辟書在手元非夢鹿之真銓法如毛率是待羝之
乳極知乾璞難問大鈞然橘柚祖梨旣匪老人之
宜種椶闌店楔惟祈宰相之兼收况大臣以至公
爲心令匹夫無不被其澤敢以尚能拜之之賤仰

卷二

依雜進巧拙之仁恭惟某官世濟王勲傳業

我聞在昔有伊尹伊陟之相望民到于今稱召虎
召公之是似然雖箕裘於鼎鼐未能粉澤於旂常
詎如格天格帝之勲卓乎是父是子之懿從容而
調萬化談笑而制四夷六十之甲子甫周已是十
六年之相國八千之春秋方盛會當率千八百而
朝王諒圖百志之惟熙益思九德之咸事老者之
閱少者之決參用所長洋然而動于然而來各安
所適公有無窮之聞邦其永孚于休尚念某壯雖
無聞老尚有志王通之門出房杜或能垂記於賈

瓊諸葛之器亞管肅決不終遺於塵立

代趙尉上丞相

寒酸一尉不當詣相國之門齋沐三熏輒復飾小夫之牘忘此身之爲不肖恃在上之有仁人斐然抽毫惕若負刺切惟大臣事君以得士爲急後學進身於知己獨難如將耻有道之賤貧烏得安不求之聞達故水火之急當大聲而疾呼而根柢之容患無因而至前燕趙如椎汝頴如錐所愧處囊之無穎天地爲鑪陰陽爲炭何嫌躍冶之不祥惟其有不並蓄而俱收然後可以高舉而引以

標二

待吾相儻未獻昌黎之詩况懷辭大臣敢賦少陵之句輒忘三瀆猶幸一陶恭惟某官道純粹精德直方大恢然秉鈞當軸之望見於縫掖章甫之時六館諸生仁勇未窺其全美三年博士聖賢已兆於相逢方將破崖岸而爲文俄遽登瀛洲而給札獨儀烏府數進輒言旋陞端殿之崇寢陟宥庭之密領衆職甚稱上意獨典漢樞有一德克享天心迄調商鼎璇璣密運平象緯於泰階寶歷紹開演鴻休於神策退小人進君子邦其永孚于休扶皇極正人心公有無窮之聞然且日下七十士而

無驕士之色抑將歲用八百負而破限負之私無
毫髮絲粟之遺爲木屑竹頭之用洋洋動于于來
者皆有歲不我與之嘆衮衮登紛紛厭者復無世
不吾知之憂自非頑頓集垢而悉無寸長孰不叫
呼扳援以求伸尺屈伏念某叨承王胄僅讀父書
乏李白之文章莫望六丁之取無劉向之經術難
希太乙之知顧念青氈悉由白戰嘗恐墜箕裘之
緒且重爲門戶之羞故自脫懷綑以來惟知力筆
硯之技解后兩隨於秋計蹉跎獨黜於春官再屈
于人未能續三世登科之記一行作吏亦既踰十

卷二

年不調之期墮在常鱗凡介之行絕無蟬蟻子
之援歸意濃而宦情薄徒索米以何爲君恩重而
臣命輕欲裂衣而豈敢俯隨簪擁仰賴甄收惟其
識我公之如古人是敢提孤身而進門下所望翹
材之館不遺光範之書或一經於品題必百倍於
光價小草有遠志已爲深根固蒂之謀大夏無弃
材願借枯木朽株之託

代上宣同知

續

登庸瑣闥翊贊機廷五材誰能去兵實自右樞而
基命四人不單稱德幸觀左社之革心一賢得與

多士舉笏恭惟某官心潛百聖識洞萬微兩學諸
生共服何蕃之仁勇三年博士獨推韓愈之公明
六鰲方戴於海中千騎忽臨於江右載驅使盪重
入郎闈進領袖於羣仙廣陶鎔於千佛合從碧落
徑啓黃扉顧展轉於納言復回翔於批敕公蓋得
賢人之久上亦占已日之孚比繹師虞晉陪兵柄
精神千里掌股四夷齊人歸鄆謹之田曾無亡矢
遺鏃之費實憲據高文之憤必有犁庭掃穴之期
然所憂正重於所忻故知己當詳於知彼惟事事
備難察察言寇萊公之拜同知夷虜聞風而六

標二

范文正之除副使士夫置酒以相驩世皆以此望
公公當出而扶世天民非予覺而誰也惟尹暨湯
宰相以時來則爲之安劉必勃如某者夙持蹇拙
全蹈迂踈耻忍貧於有道之邦強顏拾第疾沒世
於無稱之域妄意策名效官既局於卑微臨事每
牽於才分徒持文墨頗慕老蒼縫霧裁雲本欲和
其聲而鳴國家之盛穿天出月今乃破其體而成
窮苦之言人憐王某之文最宜爲誥自笑盧殷之
讀止用資詩然使之作一頌以勒燕然又否則草
尺書而招贊普於人未肯多遜雖老尚堪一行騎

驢到京自巳舉頭於白日上馬橫槊誰令仰脇於
青天不惟入悽愴之岷山又使度嗚咽之隴水奪
其數寸之管授以丈二之及馘虜皂郊取印頗如
於斗大殄胡赤谷積甲幾至於山齊豈期一落千
丈之強乃在百里九十之半魏尚削爵自難聯向
闕之鑣雍齒封侯何敢拔擊柱之劍雖一發五犯
舉負粗備然九門八翼考第尚虧猶泥在甄尺合
大鈞之問析薪匪斧誰爲蟠木之容雅聞嚴徐之
奮飛率出歸張之吹送非親非故誠無半面之寅
緣立已立人所望高情之特達惟是賀夏之燕便
學鳴秋之蟲非所謂氣和而言甘安能 命上才

心肯尚念某從軍無狀已事何言然或蒙羞頓藻
於王公固猶能烝芝菌之祥瑞定百四十三人元
功之籍難爭汗馬之勞作千二十四字聖德之詩
或助飫羶之奏

代上曾運使槃

庾吏抱關將踐更而受代臺郎持斧行奏計以遄
歸幸而隸容察之中亦既拜存全之賜未遂託根
之願難忘繞樹之情伏念某才不逮中知難語上
學詩學禮固非但志於世科肯播肯堂不謂失身

於門蔭頃嘗鷄薦竟作鷓飛眯目簸糠又強顏於
秋賦轉喉揆手還觸罷於冬烘行且及瓜誰其采
菲人不易知而知亦未易固乾璞之可羞公固求
士而士不自求恐唾鐘之難辨妄乞一封之奏或
爲再命之階敬爲曾南豐試展辦香之禮何爲陳
師道長令三徑之荒恭惟某官學者泰山國之喬
木撐腸文字決雲漢而披天章滿腹精神噓海岱
而出雲氣昨倦握蘭之直洊收分竹之庸禮樂之
遣使臣惟道王之志慮仁義之利吾國肯隨俗之
酸鹹然而華原隰之中孰若引星辰而 所開四
輩之召不出朞月之間山川出雲肯望 時之潤
樓臺近水寧無得月之思勉驢騎之一鳴希馬價
之三倍畫地作餅固知無補於飢腸點鐵成金尚
冀少回於頑面

代上林提舉

行知

服百里之勞偶逃訶譴干六條之察妄異吹噓初
非俊偉之材又乏依乘之舊乃敢持小人而累君
子其殆恃我公之如古人切以褒斜二谷之深未
如選筭呂梁千仞之峻豈若縣灘是以繡衣之褒
揚罕及銅章之踈賤然舉筦庫舉盜賊尚且惟賢

况有社稷有人民是亦為政嗜其甚矣委而弃之
必有命世之賢乃能反今之俗伏念某名為宗姓
實則儒生不忍窮於多士之時妄斗升之甕嚼雖
得雋於一科之末竟分寸以躋攀九載績用之弗
成三仕令尹而無愠所幸拙勤之相補不逃鑒裁
之至公烏獲功足為器足施維其時矣伯樂過不
睨遇不顧誰復念之敢裁小子之章試作大鈞之
問恭惟某官眼高四海胸綜九流自其不辭小官
於州縣之時已知可以大受為社稷之器屹持家
學傑立朝行再轉為丞至於三而無悶一麾出守
取其二而無嫌上嘉風雷之新中有星日之遺褰
帷燭隱按行蔽芾之甘棠摠轡馭姦前拂逶遲之
包捫尚念一寒之迹若為寸進之謀幸而桑梓之
偶同或者崩管之可采儻使藏舟於楚壑半夜遽
移是雖操琴於齊門三年奚益敢裁小擯試卜終
身鵬鷄之在秋天恐即登於碧漢龜魚之蔭尾影
望亟轉於清波

代回表通判

求汲引

同官為僚淒其一夢千里命駕厚甚尺書遙驚吳
下之非愧乏郢中之和恭惟某官抱負甚偉揚歷

彌深當日鸞栖困打頭之矮屋乃今驥展會籥足
於浮雲顧恐陳人或能爲地喚殷兄呼張丈各無
少年之誇謁周君抵李生甚思得交之幸只恨鴻
毛泰山之輕重殆非鶴髮老子之堪任某有可推
賢寧當愛力今作禁門鍵頗切懷歸贈以金錯刀
別規效報

代回謝判院

謝求推挽

暮年作別久占騎氣之來一見甚驩便辱雄文之
寵喜邂逅之適願忘褒拂之過情恭惟某官鄉里
清門朝廷素學佳人在空谷愛莫助之父子是監
倉寧無識者君來何暮我計已成自此恐有出處
之踈柰何敢當推挽之寄某罔功曳履決意投簪
某水某丘所釣遊敢祈加敬在阡在陌可來往請
俟倦歸

回林省元

求牒試

逃虛空之境過辱寵臨讀駢儷之文益知謙巽報
於何有藏去爲榮恭惟某官秀出七閩僑游三楚
舊聞林藻科目之選實出常袞教育之前睅然風
標定是苗裔欲作搏鵬扶搖之快特在雕蟲篆刻
之工幸擢天葩早收地芥某重勤覓舉極願備員

顧歎識賢之不先且復聞命之已晚誠不忍竒寶之橫道愛莫助之何待譬美玉之即人會有識者

回卓省元求牒試

辱責儷牋見需舉牒諸子弟隨臣久矣宿諾已多大樂正詔王升之限負有數然以橫弃道傍之寶孰無欲出門下之心思成物之成更俟暗中之摸索問有餘曰有則當送上以吹噓

回張學諭求牒試

辱責儷箋見需舉牒當暑紛絺綌若未謂之失時大寒索衣裘僕且疑其已晚蓋卜稼當先於嗣歲

六標二

非積薪可望於後來嘉魚得賢與共之愛而莫助有馬借人今亡矣報不成章

回鄭解元求牒試

百適裝懷見賢不敏朋緘委貺取數何多恭惟某人傑出七閩僑游三楚寸心如水家有履聲兩鬢成絲客無羶坐頤歎溢格無可薦賢大寒而後索衣裘愛焉莫助明月以暗投道路報不成章

回李新恩求宏詞文字

討論宗派不無意於通家問訊淵源知有心於緯國贈言甚辱借聽則孤恭惟某人曾湛秋霜筆翻

春潦晁董公孫之對固是世科稷契臯陶之良亦
其家學願薄人間之風日欲裁天上之煙雲千金
寧憚於屠龍一箭即觀於中鵠某語力已腐論材
亦庠所謂博學所謂宏詞昔嘗親炙旣傲翰林旣
傲相國今已迷津初非有得魚之筌乃蒙問不龜
之藥同姓也同業也詎敢吝一編之傳自求之自
趣之更願博萬卷之讀

梅亭先生四六標準卷之二

梅亭先生四六標準卷之三

薦舉

謝董侍郎 居誼 舉狀

隨驃騎之幕濫備執鞭刻公車之章遽蒙推轂心
感恩於破白面抱媿而發紅伏念某稟生多艱從
宦尤拙貴人令其出門下既不善於走趨大夫羅
而致幕中亦倍勤於收拾豈謂半年之內復為千
里之行治法征謀紛紛未定幕膺檄筆錄錄無奇
然白日實照其精誠則赤雲可占於勝氣况值匈
奴百年之運必復春秋九世之雉颺犀札而咤聲

旄在此行矣封龍額而獵麟脚竊有望焉曾未輸
橫草之勞何遽辱采蘋之薦之吳下阿蒙之學顧
曰淹該無江南子布之詞反云典麗裨益之功甚
寡獎予之實何多茲蓋伏遇某官以社稷臣為詩
書帥孤忠可貫於日月至誠足達於天淵一龜一
琴人皆望清獻之出萬牛萬甕賊必待崇文之擒
佇觀十乘之行大作三軍之氣擊蠻單于之頸慰祖
宗在天之靈犁匈奴之庭為蠻夷猾夏之戒于以
侈旂常之績歸而策鼎彝之勳况在紅蓮綠水之
間必入赤箭青芝之用某敢不力磨其鈍圖稱所

蒙插羽銘山敢銜文章之小技冶金伐石願歌竹帛之大功

謝魏運使了翁舉狀

據地承顏非有豚蹄之祝爲天啓齒廼蒙蟲臂之收勞軍將之打門發函書而驚坐難道今人之不古但虞吾黨之累公伏念其於道無聞甚愚不肖每思名教之樂地何必事功亦知富貴之浮雲不如貧賤徒緣一第之彊爲三釜之謀中懼弗洎之悲甚悔未信之仕以風爲解遂回蓬島之舡斡流而遷徑泛瞿唐之水旣元戎所自辟於天子非

標三

先生敢圖利於大夫綴錦城雪嶺之觀未容黔突厠天水祁山之役濫佐青油方深國事之憂遑復身謀之恤車輪四角何敢累推轂之人夏屋萬間亦莫認捲簾之處敢謂誠心之傾倒竟煩強箭之吹噓茲蓋伏遇某官學者泰山國之元氣年不可及寧妨待天下之清時來則爲終必得聖人之任引扁舟於蓬島閱十暑於岷山人疑魁枕參首之淹公無瓶居井眉之悔卿自用卿法吾親屬吾思駭聞渡瀘之行倏罹陟屺之變故者無失其故未能致唁於生芻誅之不可勝誅敢望噓枯於死草

忽辱遺我雙魚之寵見貽駕彼四牡之章學落質
凡顧謂識高而韻邃氣凋力腐反云才贍而意新
近功缺然遠業安在初不敢異緇衣之改何爲過
蒙華袞之褒師魯之從事陝西容有知之而弗薦
永叔之退居穎上乃虞賢者之不聞所忻吾道之
有歸豈獨小人之受賜某不知所報當勉其頑氣
象未可攀但感幽桂榛管之薦歲月坐成晚尚託
江梅桃李之香

謝鄒運使

孟卿

舉狀

王事靡盬未敢懷歸使臣見知忽叨論薦况沐成

標三

終之賜尤銜引重之恩伏念某蠢蠢隨行狙狙何
算少始知學亦有立功立言之心壯不如人已作
爲貧爲養之仕偏親弗洎百念頓消漢庭諸公漫
惜斯人之憔悴魯國男子自知吾意之蹉跎引旌
旣遠於蓬萊鼓枻試觀於灑瀕沐浴而戒行李人
謂斯何飢渴之歌采薇歲亦陽止雖連收乘矢之
發恐未免一簣之虧豈無他人欲令出其門下不
有君子寧可弃之道傍茲蒙四牡之章遂足五紘
之數在繡衣六條之察定匪徇私然華袞一字之
褒却疑過寶蓋經邦本諸政事而緯國取於文章

游夏求賜之異科雖孔門而難備董賈龔黃之殊
傳在漢世而罕全自視然前言戲耳士固伸於
知己蓋非搖尾而後怜德不待於成身却合銘心
而自厲茲蓋伏遇某官人今而心古行峻而氣平
分閫秉輅欲轍環於四海揚金斂璞真鑑別於九
流尚煩入蜀之星來卜擒胡之月子午之奇可出
但當飽戊己之屯甲寅之報未來何以寬庚癸之
呼尚屈餽餉關中之手且圖轉輸渭上之功諒思
人物之眇然僅有征夫之邇止劍外之官易冷聊
借吹噓幕中之辯非傾謾加收錄某敢不稍鐫懶

標三

習謹佩味言號門生而知恩例欲自同於蛇雀報
國士之遇我誓當小異於馬牛

謝衛參帥經舉關陞

小子狂簡之成章無能為役大鈞缺圯而播物有
味其言幸辱備於使令亦足謂之遭遇不應論薦
便累吹噓伏念某受質亡奇望世亦狹童而強學
粗知萬物之皆塵壯不如人縱得一科而何補舍
對白抽黃之業為出朱入墨之謀人言棲枳之官
決無鸞鳳渠知求芻之志固異馬牛不圖賈子之
泛湘偶際召公之分陝望塵雅拜孰非夾道以疾

馳數祗陳詞獨念此君之小異令以竿牘小夫之
智效於詩書元帥之前一年于茲五技窮矣可以
止則止方願返於屠羊莫之爲而爲駭忽勞於薦
鷄亟嘗輸款願且避賢豈期刺史之天決爲將軍
之地識字有數敢當渣博之稱了事亦癡寧有踈
通之實非相國賜之大禮之過詎至是耶使天下
洋然動于然來其必由此古之所以求士今者於
是見公恭惟某官身佩安危力關造化兒童之誦
君實久佚丘園夷狄之問潞公暫司管鑰察湖南
之從事欲冀北之空羣雖有絲麻且揚糠粃意者
恥匹夫之不獲欲其收多士以收奔魚以我公亟
展伊周之業豈惟委吏得專文武之功某旣累公
知寧當自弃少留東閣難掩人言魏勃之庸更遶
南枝或備臣客馬周之對

謝曾運使槃舉關陞

墨綬主書苦乏曳裾之譽繡衣察吏忽承推轂之
言况下考之甫書曾微勞之未效便辱吹噓之送
允爲特達之知伏念某何足控搏不堪位置抱鉏
犁而餓空谷乃無端以讀書裹章服而指上官還
不習於爲吏解后六條之察吉蠲一辦之香祝甌

窶而操豚蹄不夸而狹見九彈而求鴉炙匪躁斯
狂不謂蘇天尚爲李地燈花夜報奏橐朝馳誦說
云乎顧謂文章之典雅會計而已反稱政術之疏
通難當一字之褒乃辱八珍之牒小草之有遠志
但欲深根老芋之爲茯神誰欺精鑿伏遇某官家
傳忠恕嫡嗣文清游疇剖竹之庸繼著握蘭之望
濡轡而馳原隰疑若小然聽履而上星辰恐不免
耳尚念斗升之嘆嚼若爲分寸之躋攀自其貌耳
其言雖乏同進之交譽知其主信其客姑令從事
以流聲鸚薦一飛馬價三倍某雖無以報敢辱所
知始與筆楚辭儻遂少陵脫身之願尚煩左右筆
請歌昌黎薦牘之詩

謝林提舉

行知舉關陞

抱會計之簿書安知鼈釣瞻光華之禮樂忽拜鷄
書曾微扳援之緣何自聽聞之誤伏念某性徒是
古學不前人彘墜緒之茫茫我之懷矣踵常途之
役役誰者念之坐違汗漫之期遂逐侏儒之飽主
簿四十亦知鄧禹之笑人公車三千豈乏鄭莊之
薦士未有不求而得者吾非惡此而逃之馬失之
瘦士失之貧其來已久牂生於奧鷄生於突彼各

有由甘心妄校尉之行間絕意諸貴人之門下忽
繡斧之問俗如緇衣之好賢察之進旅之間寵以
關陞之刻妄庸人耳顧稱履行之端詳誦說云乎
反謂詞章之典雅一字已榮於華袞八音何有於
爰居其求士甚士之求公公無愧古不即人而人
自即我我則醜顏伏遇某官歛經濟材攬澄清轡
衆人皆醉措醒眼以旁觀萬物走圓改方心而不
忍念天地之大矣懼人物之眇然顧以毛髮絲粟
之長悉在權度錙銖之內有如齶齶亦與吹噓惟
今之謀人念不到此雖古之庸使何以加諸某敢
不策不肖身爲必報計馬價既增於三倍驢技更
勉於一鳴大夫薦人與之大夫固無是事國士遇
我報以國士惟旣厥心

謝衛參帥涇特薦

周公還贄僅收三士之材毛遂備賢輒在一人之
數不求而獲其得也榮切惟范蜀公之封章七輩
皆爲名勝呂文靖之賓客三朝賴其儀刑殆勸相
國家之功自旁招俊乂而始然主擇客客擇主亦
各有宜故公求士士求公苦難相值裴晉公於韓
愈至公僅使之就閑歐陽子於聖俞素交乃忘於

推薦况在踈賤何與品題某殖學多荒賦姿不穎
偶綴一科之底強為三金之謀入墨出朱職甚安
於祭竈依紅泛綠夢不到於轅門敢圖前茅采及
下菲迨今數月無補報於絲毫未始一言乞躋攀
於分寸小人屬饜而已非惡此而逃之大鈞塊北
無垠果何修而得此欲使塵埃之吏進為館學之
儲受德者不待成身感知而已盡已者謂之確論
揣分謂何伏遇某官以社稷臣為詩書帥傳說之
輔台德宜揖巨川君陳之和厥終暫藩王室式篤
緇衣之好庸為夾袋之藏故令駑才亦玷鸚表某
敢不激昂大節感刻異知諸侯薦人與之諸侯固
無是理國士遇我報以國士請事斯言

謝曾安撫

從龍

特薦

伏蒙鈞慈露章特薦者竊以儀曹論秀舊累殊知
帥聞舉能今叨亞選負留連之藻鑑辱根抵於朽
株施重人輕感深言淺伏念某不堪位置何足控
搏少而取有道之賤貧冒焉干祿壯欲行所知之
學問愚不適時今難望不龜之封聊爾監無懈之
郤由貳攝長無僭石之儲晏然粗廉且平信蠻貊
之邦行矣初無詞藻何有聲名周公欺我哉還贊

僅收於三士韓愈亦人耳願忠豈後於百官濫吹
其間循涯而懼茲蓋伏遇某官爽邦良弼命世元
臣暫勤分竹於武安共後聽麻於文德曉行夜醉
已開南嶽之雲暮捲朝飛又作西山之雨雖自湖
入海是亦東歸之兆然望魁與台亟還北落之樞
庶不戰可屈於人兵見用儒無敵於天下一莊荒
甚亦思向花木之陽半刺芬然詎意入蘋蘩之薦
維昔武侯之一表實同說命之二篇首烏推向籠
之淑均繼則舉費禕之忠實今以二難并之美併
於不肖之身自視歆然公言過矣然士固伸於知
已則德豈待於成身諸侯薦人與之諸侯久無是
事國士遇我報以國士當厲乃心某敢不剗磔鈍
頑鞭磨庸惰號門生而不知恩者非人也詎敢弭
忘視匹夫不獲其所者若推之更新終惠其爲感
槩罔旣鋪茶

謝林寺丞行知特薦

素鞞御祥夢空懷於故宇綉衣薦士選猶及於陳
人睽離恍隔於累年屯蹇旣濱於九死廼蒙記憶
尚送吹噓始而驚疑終則慙懼人弃而已獨取此
心定異於常情今無而古則聞茲事實關於世道

非言可謝於禮敢違伏念其命固不猶材亦無似
湘濱樵悴安得自高蜀道嘻噓固爲親屈彼蒼有
罰莫白此心棘人藥藥勞心忉忉幸而終制達官
紛紛諸公衮衮誰實恤孤忽聞一節之趨嘗及十
夫之獻漫令廁九人之後材難不其然至謂冠一
路之賢吾斯未能信豈固察驪黃之外憐其困牛
皂之同人謂斯何公言過矣舊游門下旣已玷一
株之挑今去籠中乃猶取三年之艾恩淪於髓媿
溢其肝茲蓋伏遇某官德與春和氣如秋杳方淳
熙之雜然並進固不乏於時材惟簡肅之老而愈

六標三

剛實見稱於聖主今賢者識其大者蓋有之是以
似之不然再轉而爲丞誰能三已而無溫徧持使
盪始入郎闈君不行兮夷猶羌難得而覩縷廣帥
之重唐制已然上弄印以選賢公聞命而就道何
恙弗已盡興則歸得之傳聞似恐昔疾而今愈恬
於出處豈非人醉而我醒然天下之所少者非材
則海濱之來歸者有日勤相我國謹簡乃僚勉令
進進不已之人皆動于于然來之意某敢不請事
斯語力勉其頑德不待於成身豈但叙柳河東之
感士固伸於知己自當發韓昌黎之狂

謝瀘帥楊尚書

汝明

屬城受察已感此身帥聞簡僚更叨舉首得固榮
於券外愧有玷於牘端嘗觀七篇之包羅頗考五
人之名數齊王爲都之知罪惟孔距心獻子取友
之難忘必樂正子使下駟或當於上駟則後魚或
謂於前魚矧某不才舉世所鄙坐力田之傷地脉
迄不逢年欲養生以息天黥未能絕粒得郡豈嫌
於如斗蹊田適值於奪牛有土此有財貧於近監
改井不改邑窮乃無錐不幸千里之旱可哀竟無
斗升之水以活蒙袂弗勝其貿貿納溝冥覺其累

六標三

纍掾火暇問大人只得焦頭而爛額無麪欲爲巧
婦但知剜肉以醫瘡患飢實自於己飢忍痛難思
於方痛非惡其聲也實關鄉人孺子之心何誕之
節方固賴方伯連帥之惠鶴膝蜂腰尚未全復牛
溲馬渤何足兼收此蓋伏遇某官德與春融氣如
秋杳閭闔之開黃道夙高北闕之星辰斧鉞之下
青冥暫養南山之霧雨七年可即戎矣九戩以公
歸兮觀察急於賦刺史私於民洞知委折今夕飲
者恩來日按者法未忍舉行閔其存活數千之羸
寵以治平第一之薦然饑饉扎瘡之甫定熙洽謂

何且文詞學問之久荒博深安在尚書拔十得五
矣孝廉聞一知幾耶德不待於成身士固伸於知
己某敢不懲羹吹沸求牧與芻諸侯失國託於諸
無使飢餓於吾土國士遇我報以國士敢忘佩服
於斯言銜荷惟深敷宣罔既

代謝衛參帥

浮食畫墁又占芙蓉之幕飛章推轂遂依桃李之
門請裁小子狂簡之章少謝大鈞塊土之賜伏念
某地寒無挾天巧亦慳膽落穹廬莫繼忠宣之衣
鉢力扛洪鼎又慙文惠之箕裘徒藉義方獲沾世

標三

祿雖幸挂名於秋賦未能得雋於春闈盤旋州縣
之勞祗慄簡書之畏偶終墨綬獲近碧幢適泰堦
六符之光擁元戎十乘之寄生匠石之園長伯樂
之廐固可卜其終身挹浮丘之袂拍洪崖之肩復
自怜其凡骨聊作斗升之活敢希分寸之攀况西
山行地之仙有八百輩而旌陽同日之舉僅十二
人不應妄庸亦預推薦茲蓋伏遇某官三朝元老
四海真儒魁下兩星付榮進於素定曾中五色補
造化而不言靡辭三命之滋共要歷四方之維翰
自洪移福瓣香續派於南豐由登入京夾道寄聲

於司馬閩閩休歌於來暮吳儂莫切於去思陝而東陝而西方欲弘周召之化洛之南洛之北務多收溫石之材包荒得尚于中行采菲何嫌於下體致茲孤進亦累一陶某敢不退自激昂勉圖報稱滕王閣之合賓佐既辱異知翹材館之招賢人應無棄物

代謝帥座

契家子弟謝合京大

塵埃委吏夙依夏屋之萬間造化全功遂拜春風之一紙受知襞積懷感輪囷竊以山巨源之念遺孤吾聞語矣柳子厚之記先友誰實圖之非遲遲

標三

於揀死之八珍則淺淺於蘇枯之一漚有如念故人之子擢之於筦庫之中成始成終不進不止以此稱於天下豈當求之今人伏念某窺管識卑挈瓶知小備太史牛馬之走終覺駑庸讀先人科斗之藏卒無象似羌爲貧而出仕窘將母之不遑倚門之望既深對床之歡亦廢雞鶩爭食難舒狷者之懷烏鵲無枝漸作歸歟之計豈謂荆潭之裴拍首求灑穀之石洪總角小方憐其進拜於床下厥齒長矣不應曳尾於塗中假之寵靈長其光價遂從數月卒獲四章譬如爲山實易虧於一簣志在

流水誰能寫之五弦忽逢公車之交遂合浮圖之
穎父書是讀果何有於家聲兒事已癡豈真明於
吏治伏讀八字足華一生知而翼之所謂如天之
福我顏之厚矣未知何地以報公此蓋伏遇某官
藩屏重湖準繩百吏塊北播物大鈞運於無垠追
琢成章小子至於有造憐宣孟之無後撫叔敖以
如生褒華袞之一言器蟠木於萬乘遂令長往之
興亦入旁招之儲重惟此恩將何以謝某敢不恪
共爾位惟既厥心我有二天已幸廁七十家之舉
士更三日猶希與八百吏之除

代謝茶漕司

需次糟丘敢圖內舉贅負油幕使效裏言昉茲服
役之初敢廢修辭之敬竊惟中興重藩宣之寄故
於機事置書局之官當建炎羽檄之交實許陪於
贊畫迨紹興鞅索而後始無預於文移雖曰閑曹
然亦異數如某者志雖自好學未知方爲箕爲裘
亦自勉家傳之業不狩不獵居然承世祿之恩未
敢荒筆硯之耕然已負懷紉之愧一行作吏甚安
莞庫之卑萬里侍親忽有從軍之命猥容浮食使
典內籌幸雖出於天然恐有爲之地者恭惟某官

氣資疑遠風調浚明黃鍾爲宮散作人間之和氣
大玉不琢中藏天下之至文肯爲入蜀之星實卜
擒胡之月周爰咨度暫煩四壯之馳薄言旋歸即
護六飛之馭凡叨氣類例沐吹噓致令疵賤之蹤
獲隸走趨之數某敢不靖共爾位洗濯其心詩禮
聞於過庭敬修可願孝友施於有政增益未能

代謝茶使與合尖

綴玉鈐之冷幕已迫踐更飛金節之薦函偶成合
穎功莫崇於引重惠無大於成終消吉日以修辭
順下風而請謝竊惟選舉旣弊授受俱難相馬川

卷之二

從之輕已發蘇老泉之嘆用決者恨其早可考黃
山谷之詩君驕士而士亦驕君主擇客而客或擇
主故達官多寡助之恨而志士無苟合之期兩不
相逢一至此極况如大正可謂小知緬思舊學之
碑有慙元獻不傍貴人之戶却似小山第恐荒簪
笏之家未免厲布韋之業藝蓋十載於太學僅竊
末科草茅一介之狂言幾投大俊甫息浮湘之柁
冒隨諭蜀之車錄錄無奇安有幕中之辯沾沾自
喜若爲席上之珍偶蒙諸臺共剡乘矢爲山九仞
極知一篲之虧撞鍾千鈞此豈寸筵之力誰其從

史辱此吹噓樂莫樂兮相知何敢急於自衛遲之
遲而又久諒欲察其所安好不改於緇衣褒果踰
於華衮退惟內樸反稱疑重之姿正魏中乾何取
純深之學殆假點睛之筆俾舐換骨之丹人訝其
通籍之階宜淹而速自恐負親民之寄雖寵若驚
此蓋伏遇某官風鑒精明天機沉邃透遲苞栩盍
周道之遄歸蔽芾甘棠殆召公之是似峻東壁圖
書之領專西秦摧牧之司相馬舉肥恐小駟有足
乘之理煎茶有味思大匠無可弃之材欲令轅下
之駒謾備籠中之物故雖弄印迄使在鎔某敢下

標三

謹佩此恩力鞭其鈍公車薦士諒不收私報之愧
直道事人持此答曲成之造

代董侍郎謝史丞相

六年百謫託大造以全生一旦異恩錄微勞而贖
過盡復官階之舊仍沾祠廩之新毫髮不出於他
人頂踵皆歸於化地伏念某夙無操挾積有僥逾
州縣常才既躡從甘泉之橐藩垣重寄更濫分益
部之符指心願報於寵光量力終牽於分量體廟
謨安靜之意何敢動兵承宣司減汰之餘又難增
戍然盡地而守之策亦無日不討諸人會殘虜欲

竄身於三秦聚重兵專垂涎於四蜀計我師之籍
無八萬人分邊而屯幾二千里上藉朝廷之威
德下憑將士之忠誠首殄渠魁既奏皂郊之一鼓
繼殲羣醜不留蟠冢之隻輪偶興元偏帥殞於挑
兵致散關諸卒潰而挺次豈雖在葦臯去鎮之後難
逃孔明貶秩之辜投畀囚山甘作浯溪之老適逢
沛澤遂叨汝水之歸茲遇飛龍之御天曲念病駒
之屬地錄其尺寸跼許復於雁門活以斗升涸足
蘇於鮒轍孰主張是遂登濟茲此蓋伏遇某官柱
石九筵網維八極談笑洗咸池之日從容封

標三

之泥博陸之益戶萬七千詎足報伊周之烈以陽
之書考二十四自應編齊晉之功方藏疾以匿瑕
務厲世而磨鈍復其官為子孫之計見此恩乃父
母之心某敢不仰佩殊私益磨晚節誘我松桂未
敢勒北山之移收之桑榆庶幾補東隅之失

代陳師機

元勳

謝衛參帥

細書成文蒐實材於公舉大鈞播物挈冗吏以名
聞雖嘗備於使令初無堪於選錄况受及瓜之代
難徵采菲之恩不謂三人之占乃使匹夫之被一
陶異甚再省矍然伏念某頑疎之資浮沉於世塵

容俗狀果何有於詳華綿力薄材豈真能於強濟
門蔭只宜於平進閭僚自合其官勞粗奉文書無
可言之功狀非有方略難曲盡於事宜是真常鱗
凡介之匹儔何計乘鴈雙鳧之多少矧入幕之日
淺而歸袖之風披三匝彷徨不識捲簾之意一封
覲縷忽聞推轂之言得之駭然望不及此既非請
謁而得是謂特達之知公求士甚士求公久無是
事子生孫復孫生子難報此恩伏遇某官直大而
方清和且任與人不求備此心即孔孟之心乃言
底可行所論合禹臯之論暫甘棠之美召即其真
之相周雖俊又始入於旁招而巧拙或容於
遂令遯尾之客亦入需頭之章某敢不銘刻鴻私
鞭磨駑鈍藉使百無逢於世亦有一回顧之榮指
心圖報於品題滕口難論於報效然稱於天下曰
知己今者非耶使遇以國士報衆人天厭之矣

代章監倉謝衛安撫

琢

下士代耕之祿僅守積倉上臣事君以人忽騰薦
積憐其出自於幽谷使之陟彼之高岡愧在盧前
感從隗始切以筦庫七十家之舉古道久衰法筵
第一義之觀今聞尤贊有嚴十乘所部九州鳳翼

龍鱗孰不希於攀援牛溲馬渤皆有望於蓄藏及
下車之云初乃推轂於某賤其爲銜戢實倍等夷
伏念某質窳亡竒材卑莫抗服箱以走渠憐滿脰
之黃鍾按劍無因誰肯先容於白璧強折腰於爲
米真眯目於簸糠今蒙需章可使升秩父書是讀
果何有於家傳兒事已癡豈真堪於世用一字之
褒已過兩喜之溢何多伏遇某官以社稷臣爲詩
書帥與人不求備收毛髮絲粟之微嘉善矜不能
無絲麻蒯管之間有如頑頓首辱甄陶九戔之魚
鱗魴即逆歸於周室千里之馬騏驥會文獻以

楊三

庭其敢不增所未能修其可願常爲委吏已蒙某
菲之收實被周行尚幸蒹葭之采

代趙撫屬

汝詣

謝衛安撫

木流行久汙芙蓉之幕岸花飛送漸違桃李之
蹊重感眷留倍深銜戀更裁四六少謝萬分伏念
某再省妄庸一何僥倖當大參政十乘啓行之日
適小丈夫三年垂滿之時惟其樂莫樂兮相知是
以遲之遲而又久敷施翁受更無假於先容前輓
後推真不遺於餘力居然穿縞之末迄成合穎之
謀感溢瓶壘功歸爐冶乃瞻衡宇情已迫於忻奔

及告油幢恩數勤於眈眈謫將滿百辭不免多今
蒙慨然允爲幸甚鷓鴣水擊強希萬里之圖烏鵲
月明采結一枝之戀恭惟某官東郊道洽西陝化
成展長沙千里之平民無遺便對宣室半夜之問
王曰遄歸凡今日毛髮絲粟之才皆他時樽罍侏
儒之用欲作大鈞之問又虞小器之盈敢陳掄謝
之詞更致依投之悃常擬報一飯柰何回首於南
山可以觀四方自此馳神於東閣

代趙撫屬女謂上提刑

油幕綴貞漸迫終更之候繡衣察吏鼎來剡表

標三

章初非光明俊偉之材又無假借拔援之勢古之
所以薦士今者於是見公伏念某名爲宗支實本
士檢取懷綳之簪笏恐受衆疑隨草布之練緗偶
叨一第慨念勉峴程回之術業終愧毛原周召之
等夷何以亢身莫如殖學方以此自厲於已何敢
輕受知於人細補大宋壹真心於輪扁長箋短檟
肯請命於子公來事元戎實叨末屬適鼠竊狗偷
之盜蕩搖我疆奪鳥飛魚泳之驩劬勞于野濫承
渙渥許減常負然風憲之一削不圓則天門之九
關難扣解后行露之聽寅緣宿霧之披甫及褰帷

遽蒙推轂既不為有力負舟而走又不生無因按
劍之疑伯氏堙仲氏虜安得齊名之實臺中評幕
中辯初何贊畫之功猥借溢言特加吹送捷為之
磬十六大似無心而得之公車之牘三千誰有不
求而至者內則感國士之遇我外則賀天下之有
公輪困在肝絨封於髓伏遇某官人今而道古內
介而外通嘉善矜不能所學皆孔孟之學舉直錯
諸枉此心同伊傳之心駢駢六轡之載馳落落萬
物之吐氣有懷鴛鴦之序及識鶴鴿之原參以旦
評慨然露奏振雲天之高誼策塵土之蹤公

標三

子之薦不疑昔聞其語楊湖南之信陳子今想其
言某敢不深自佩銘痛加砥礪謝恩私室敢矜小
技之文章不辱公門願勉大閑之節誼

代趙撫屬上衛參帥求合尖

汝諱

一官頂踵冒假借之深恩三沐肺肝乞品題之終
惠恃在有容之大忘其取數之多伏念某雖出天
潢初無地望燈花何喜一科不補於遺餘袍葉半
枯萬事已甘於濩落浪爾依芙蓉之幕下誰其采
薜荔於水中適逢先十乘於偃藩遂得厖百僚而
隸役不虞一見便辱異知識元方而用季方久無

此事媒石子而羅溫子不曰非才借以齒牙付之
羽翼知我莫如鮑叔逢人必說項斯遂令虧篋之
山迄作合尖之塔惟是過屠而大嚼難忘見麴以
流涎兼幸生匠石之園託根未正縱欲附翹材之
館張本已踈豈無列薦之負亦有十科之目或蒙
送上置謂成終大釣無垠拔士不遺於餘力小子
有造歸恩豈在於他門恭惟某官以社稷臣爲詩
書帥喬嶽之蓄雲泄霧人蒙潤而不知滄海之包
乾括坤物何歸而不得尚念碧油之屬欲舐丹竈
之餘縹緲孤鴻漸恐回頭之斷滿差他歸燕窩能
絕望於捲簾幸從昌黎弟子之負徑冥陸氏門生
之列茅茹以其征吉今朝已免於西曹桃李悉在
公門他日尚希於東閣

代陳縣尉愷上衛參帥求舉

酸寒漂尉古須強箭之吹噓憔悴湘濱今累大釣
之塊北百無操挾萬有狂愚然而恃大參政之寬
洪必不責小丈夫之躁妄切以三吐哺三握髮而
下士周公豈欺我哉一舉手一投足之乞憐韓愈
抑亦人耳况幸在犀甲熊旂之下乃無與稀苓雞
壅之中恐虛此生何用於世是以頃者之詣府敢

於冒烏而呈身溫乎其和可知既蒙異顧粲然有文相接實激懦衷惟是下考之垂成猶冀上天之吹送懼捲簾之或晚忘躍冶之非祥伏念某鹿鹿亡庸狙狙何取砥節礪行不能窺前輩之藩籬種學績文且未識古人之糟粕半生一第寸祿八年茅舍聽雞猶是儒酸之氣味竹弓射鴨安知吏隱之風流然粗覺無媿於心幸以此不惡於下慨念一寒之迹若為再命之階得拜馬前已遂執鞭之願無為牛後遂興見彈之思然記碧油之幢頗辱黃金之諾以其時則可矣敢不長鳴異乎人之求

標三

歟真成自鬻伏遇某官直方且大清任而和公路垂紳即正槐廷之面侯方賜履暫為蘭畹之滋遇民猶兒求士如渴東山瓜苦共思零雨之遄歸南國棠甘未若敷天之純被顧以櫻闌居楔之細皆在毛髮絲粟之中欲善鄭來請從隗始某敢不激昂駑鈍報稱鴻私桃李悉在公門既感東風之鼓舞葑菲無以下體尚幾秋露之均沾

代趙縣丞

善倪

上撫州林守

洽

求舉

贊長官之雨不善避嫌戴刺史之天風蒙假蔭惟是斗升之活若為分寸之躋流涎久動於麪車病

穎輒希於箕秣印刑果否冶躍可乎切以甯戚之
歌醜明之言雖賢不免匠石之園伯樂之廐所係
尤深既辱在於使令且已叨於識察將以知己稱
於天下乃使勤子至於他人縱欲真心何以藉口
伏念某號爲宗姓實則儒生束髮所期豈念祖宗
之簪笏摘髭不力竟慙伯仲之墳瘞怵於食貧遂
爾諾仕一行作吏已徒勞州縣之間再轉爲丞真
覺出簿尉之下顧惟蹇拙粗守公勤不利走趨寧
免長官之罵尚能拜起孰非太守之恩試以代庖
幾於環轍莽誰欺於撥牧復攝事於子男柰何五

標三

北

章漠無寸援得不得之有命當安造物之鑪錘樂
莫樂兮相知更傍誰家之門戶伏遇某官眼高四
海氣蓋諸公千佛姓名早宜登於文石三神步武
晚猶會於郎星載馳子子之旗有偉皇皇之轡胡
然歛惠復此專城公不嫌旋馬於蟻封士則嘆烹
雞於牛鼎雙旌屬爾五袴暖然謝康樂之文章尚
餘此地顏平原之氣節如見其人竊窺帥之文
可見察吏之意不知庸下還入選中既旁無蟠木
之容姑且作大鈞之問盡耕去牙角雖無種學之
泓澄託根借恩光或許孤芳之皎潔

代黃主簿

夢得

上樓倉求台尖

觀

瞻使槎於霄漢無地修容抗簿領之塵埃以身得
察聞高標之戍削絕末俗之黃緣遂忍恥以自鳴
望徵恩於回顧切以爲山九仞正虞一簣之虧持
綆百尋斯動三途之望故功莫崇於引重而恩無
大於成終必以爲無益而舍之則未有不求而得
者伏念某崎嶇百戰漢落一科棲枳棘之叢中但
合出朱而入墨攀芙蓉兮木末安知泛綠以依紅
偶效役於轅門遂贅員於幕府文書唯按真成俗
吏之爲獄訟如絲粗了癡兒之事兩蒙連率交刺

標三

公車惟是緇衣之三章尚須華袞之一字月明繞
樹自憐烏鵲之何依海上問津或謂斗牛之可訪
惟是夙蒙於廉察未嘗得效於使令冒然有言可
謂不韙然苟以平昌之言足信則或知尹公之取
必端徑援筆以點睛當勒銘於刻骨恭惟某官盛
名如畫和氣猶春自其甲進士之科即合庚佐王
之學百川旣倒屹砥柱之固存萬木盡僵凜嶺松
之獨秀由曲臺之議禮謂直筆以記言居然偏城
歛此大惠田里之無愁嘆有偉民庸原隰而有光
華亟將使指福星所照旱魃已消然設有膠東三

萬戶之流民必將勺江西斗升水而活我尚煩周
度爲此曲防然後遄四牡之歸于以苞六飛之馭
思天地之大矣念人物之眇然欲善鄭來請從隗
始主簿能令公喜今謂斯何使者或不汝容信乎
命矣

代回揚評事洪之謝求薦

具一鷄之表方有待焉遺雙魚之書何其駛也不
能辭璧又愧報瓊恭惟某官騰茂蜚英閔中肆外
十事九律備知小大之情千條萬端未容上下其
手見何晚也愛莫助之儻寬食麩之期敢愛拔茅
之力此亦公舉安用謝爲某報國無功知賢不早
翺亦云審知足下矣豈復真疑起在此敢勤他人
乎更祈加察

回資官王縣尉謝舉狀昌大

某謹簡乃僚因剡公車之牘真升在上詎收私室
之恩從而謝焉非所望也伏惟某官器能瓌碩趣
造端溫紫電神鋒夙志屠龍之學青真強箭暫閑
射鴨之弓今大夫羅而置幕中宜諸公爭令出門
下亦意飛黃之去何憂破白之難勤子至它人乎
輒復吹噓而送上見我有此客否定皆摸索於暗

中某過辱貽箋良高陳誼蘋蘩可薦其何恨行潦
之濱桃李不言度即有成蹊之日

回郭僉判謝舉狀

仲洪

謹簡乃僚輒效吹噓之送非相爲賜何勤駢儷之
詞銜袖鳴謙開緘擊節恭惟某官器資凝遠文獻
靖共大夫不均我獨賢游子男於四國陛下用少
臣已老尚賓客於諸侯所聞止一簣之虧然又閱
千帆之過陟彼北山而憂父母慕有切於終身失
之東隅而收桑榆恩冀沾於錫命有嘉懇款合命
那融用是采焦尾之桐初非有揆鼻之木觀其主
觀所爲主幸可免勢利之嘲簡厥修簡其不修願
不負品題之意

回成副將謝舉狀

行三軍則誰與正賴戎昭舉一人焉拔尤亦維世
選何勤私謝更以文爲恭惟某官揚歷甚詳慷慨
自許執干戈衛社稷克稱其家安邊境立功名不
聞亦式是堪勇往爰以名聞某獲共扞城敢忘推
轂霸陵醉尉呵李廣不足爲懷成都猛將有花卿
正須努力

回史郡僉謝提刑舉狀

使家選衆所舉惟賢記室修辭何爲至我自合卷
還於鯨錦又疑已費於麝煤伏惟某官揆材不貲
藏器有用暫作糟丘之主屈爲冰幕之賓奮迅驥
程何慮缺書馬之一飛騰鷄表便當足鳴鹿之三
是爲特達之知豈俟吹噓之送某誤勤稱謝但切
負慚同僚未嘗聞知人遐不謂矣貪天之功以
爲己渠敢爾耶

代回揚評事

洪之

許舉狀

助國薦賢我已慙於不武飛牋陳誼公何富於斯
文進而三熏敢不重拜恭惟某官居官能大折獄

標三

惟良廣夏萬間徒啓乏才之歎陽春一曲反成寡
和之音頃珠璧之暗投恨衣裘之晚索深恐遠井
之待有孤時夜之求汔濟云初踐盟敢後子若無
言幾失子况又崔李之繼至交說耶君家所有更
贈君無忘孔孟之養氣傳道者某粗緣然諾存厚
詞華得古磬於犍爲君言過矣獻天球於清廟予
日望之

代回高承直

不倚

謝舉

奉一札以推賢徒得君重合衆言而剡奏安用謝
爲貽牋惠然爲禮過矣恭惟某官蜚英戚畹策雋

儒林翠竹碧梧籍甚名家之秀紅蓮綠水藹然入
幕之聲國人曰賢然後用之君子之道焉可誣也
某與箝紙尾甚醜面顏遣介奉咫尺書良感渠渠
之意今子使萬里外敢懷惘惘之憐

代回危教授謝列薦

頌

及第經年未脫選調入京注受幾年而未得闕

舉爾所知不如鄉人之善者於我乎館今為有力
者奪之隨衆笑而笑焉非所謝而謝也恭惟某官
早收名第獨振妙聲坐廣文之氈似成一十四考
待公車之詔行及三百六旬所賴金玉之相不改
簞瓢之樂昔三人占而汝則逆用靜為宜今八音
諧而人以和來儀可必其甚腐於力徒味其言苟
文若之不進不休於子媿甚吾夫子之可久可速
惟君裁之

代回崇仁潘知縣

方

謝舉

代何月湖

比剡需章聊紀陟明之績鼎來巽積願捐投暗之疑
受言藏之無可謝者恭惟某官刃有餘地琴不下堂
君子學道則愛人討望風而成俗小人難事而易說
肯違道以近名作新鷄泮之好音餘事虹隄之奇觀
是為實茂當以名聞某推轂力縣投簪心棘潘令君
之桃李度已成陰何將軍之山林惟當託蔭

代回涂察推

求舉未允

通家講好托年契以為多助國薦賢惜歲負之無
幾裘不供於晚索璧仍負於暗投所幸在邦域之
中必能察形骸之外恭惟某官槐根之正蘭茁其
芽俊逸參軍已露囊中之穎逍遙嘉客竟歸幕府
之羅乃今懷黃拖紫之人半是泛綠依紅之客寧
須畫餅更助譟旗其有味其言甚腐於力請待來
年之麩時則易然恐及往戍之瓜風斯下矣

標

梅亭先生四六

卷之三

梅亭

聖



[Faint bleed-through text from the reverse side of the page, including characters like '公', '察', '年', '契', '為', '多', '助', '國', '薦', '賢', '惜', '歲', '負', '之', '無', '幾', '裘', '不', '供', '於', '晚', '索', '璧', '仍', '負', '於', '暗', '投', '所', '幸', '在', '邦', '域', '之', '中', '必', '能', '察', '形', '骸', '之', '外', '恭', '惟', '某', '官', '槐', '根', '之', '正', '蘭', '茁', '其', '芽', '俊', '逸', '參', '軍', '已', '露', '囊', '中', '之', '穎', '逍', '遙', '嘉', '客', '竟', '歸', '幕', '府', '之', '羅', '乃', '今', '懷', '黃', '拖', '紫', '之', '人', '半', '是', '泛', '綠', '依', '紅', '之', '客', '寧', '須', '畫', '餅', '更', '助', '譟', '旗', '其', '有', '味', '其', '言', '甚', '腐', '於', '力', '請', '待', '來', '年', '之', '麩', '時', '則', '易', '然', '恐', '及', '往', '戍', '之', '瓜', '風', '斯', '下', '矣']



